



La grotta da Lourdes da Glion

La sora priura dalla claustra ha mussau in liug da forza

AUGUSTIN BEELI/FMR

■ **Enviers gl'onn vargau eis ei stau ina midada evidenta: Da Pastgas 2020, egl onn da Covid-19, han ins buca astgau festivar ellas baselgias. Uonn ei quei stau pusseivel, cun mascrinas, la distanza ed il mied da desinfectar. Aschia era ella claustra da Glion. Ina scuvretga buca lunsch naven ei la grotta da Lourdes sur il santeri.** Gl'onn 2021 ei per las soras da Glion e da Cazis in giubilar, igl ei 800 onns dapi che sogn Dumeni ei morts 1221 a Bologna. El ei il fundatur digl uorden dils predicaturs. Gia 1207 ha el fundau a Prouille en Frontscha ina cuminonza claustrala per dunnas. Otg onns pli tard ha el fundau cun approbaziun papala gl'agen uorden dils paders dominicans, e 1216 quel dalle soras dominicanas. La cuminonza claustrala che sur Gion Fidel Depuoz ha fundau 1865 a Glion, ei s'associada 1894 alla regla da s. Dumeni. Sonda vargada ha la priura generala, sora *Annemarie*

Müller, mussau al redactur dalla FMR in'attracziun zuppada a Glion che ha buca connex cul giubileum dad 800 onns. Igl ei in liug idillic sur il santeri dalla claustra, ina zona da ruaus sur il marcau. Datier dalla claustra moderna baghegiada 1969 sesanfla la grotta da Lourdes. La ramur digl ual dalla Val Sontga Clau dominescha cheu, si dil marcau aud'ins empau dil traffic motorisau e la truscha da plazzals da baghegiar. En quei areal antruras fetg solitari ha la claustra schau ereger 1929 ina grotta da Lourdes. Igl ei stau gl'onn ch'ins ha commemorau 50 onns dapi la mort da Bernadette Soubirous. A quella mattatscha da 14 onns ei Nossadunna immaculata cumparida l'emprema gada ils 11 da fevrer 1858. En tut eis ella cumparida 16 gadas en ina grotta ella vischinonza dil flum Gave. La nova ei sederasada ell'entira Europa, il liug ellas Pireneas ei sesviluppau ad in dils centers da peleginadi pli renomai dil mund.

Per esser datier han ins construui en numerus loghens imitaziuns dalla grotta originala. 1929 sesanflava la claustra dalle soras da Glion aunc giu el marcau, el quartier da Sontga Clau sper il spital. Pigl anniversari da 50 onns han las soras schau ereger si Quinclas ina grotta da Lourdes. Il project han ellas confidau agl impressari Lorenz Caduff da Schluein. Quel ha tratg a nez la topografia agl ur dalla Val Sontga Clau, ina zona cun greppa ed uaul. En in territori natiral denter gronds blocs erratics ha el scaffiu in liug idillic cun scalas, in plaz cun plattas e fontaunas. En ina nischa han ins plazzau la statua dalla Nossadunna cul vestgiu blau-alv. 1933 ha papa Pius XI declarau sontga la muniessa Bernadette Soubirous e la grotta da Lourdes a Glion ei daventada per cartents dalla regiun in liug d'oraziun e cunfiert. Diversas tablas votivas d'engraziament regordan oz a gliעד che ha implorau agid en quei liug.



Sora Annemarie Müller, la priura generala dalla claustra da Glion, ha mussau la grotta da Lourdes da Glion.

FOTO AUGUSTIN BEELI